

Scumandar occurrenzas cun privel da feu

Cussegl grond accepta revisiun da la lescha per la protecziun da feu

■ (anr/ac) Il cussegl grond ha concedi a l'IAE il dretg da scumandar u interromper occurrenzas che possedan in grond potenzial da privel da feu. La nova pussaivladad è part da la revisiun parziala da la lescha per la protecziun da feu e da pumpiers. Ni entaifer la consultaziun, ni en la cumissiun predeliberanta, ni en il cussegl grond è la revisiun parziala da la lescha per la protecziun da feu e da pumpiers stada dispaivla. Uschia ha la revisiun passà la discussiun enteifer il cussegl grond mesema passada senza impediments ed ha chattà il consentiment da deputadas e deputads. Unanimamain ha il parlament decis d'entrar en la discussiun detagliada.

«Lescha actuala basegna tschertas adattaziuns»

Sco quai ch'il cusseglier guvernativ e president da la regenza, *Christian Rathgeb*, ha explitgà sajan las novas prescripziuns da la protecziun da feu che la Cuminanza da las assicuranzas da feu chantunalas haja introduci sin l'entschatta da l'onn 2015 in dals motivs per ina revisiun parziala da la lescha. L'applicaziun da la lescha chantunala che dateschia da l'onn 2010 haja demussà in tschert basegn per adattaziuns. «Ina da las adattaziuns principalas è la nova basa legala concedida a l'Institut d'assi-



En connex cun la revisiun da la lescha per la protecziun da feu era l'admissiun dals spazzachamins vegnida adattada. FOTO P. DE JONG

curanza d'edifizis chantunal (IAE) da puzas che han lieu en in edifizis cun mancanzas tecnicas che pertutgan la protecziun da feu», ha el declarà. Vinavant ha la revisiun adattà las lubientschas per events cun

objects pirotecnics, lubientschas che sa drizzan a las prescripziuns da la legislaziun dals materials explosivs.

Contribuziuns als indrizz dad aua

Tenor las explicaziuns da la missiva da la regenza èn ils indrizz dad aua da basegns per stizzar feu en possess da las vischnancas en in bun stadi. Il chantun vul segirar che quels indrizz vegnian mantegnids scosauda per segirar la funcziun a lunga vista. Las stentas da las vischnancas da mantegnair l'infrastructura dad aua da stizzar vul il chantun sustegnair cun contribuziuns da vart da l'IAE. Ina basa legala per quellas contribuziuns manca suenter che la nova golvaziun da finanzas ha abolì quellas contribuziuns a las vischnancas a partir da l'entschatta 2016. Ina basa legala ch'il cussegl grond ha stgaffì entras l'acceptanza da la revisiun da la lescha da la protecziun da feu. In ulteriur punct da la revisiun pertutga ils spazzachamins. L'admissiun dals spazzachamins ha stuì vegnir adattada a la giurisdicziun da la dretgira administrativa grischuna. Er quai è uss il cas grazia a la revisiun parziala per la protecziun da feu e dals pumpiers. Il cussegl grond ha acceptà la revisiun parziala da la lescha per la protecziun da feu cun 109:0 vuschs e 0 abstenziuns.